

# Tikinnermi nioqqutissanik akitsuuteqanngitsunik eqqussisinnaaneq pillugu Namminersornerullutik Oqartussat nalunaarutaat

Nioqqutissanik eqqussuineq annissuinerlu pillugit Inatsisartut inatsisaanni nr. 18, 30. oktober 1992-imeersumi § 17 aamma § 46, imm. 5 naapertorlugit aalajangersarneqarput:

**§ 1.** Tikinnerq tassaavoq nunanit allanit, tassunga ilanngullugit Danmarkimit Savalimmiunillu, akitsuuteqarfiusumut tikinnerq.

*Imm.* 2. Tikinnermi angalasut nioqqutissanik akitsuuteqanngitsunik nassarsinnaatitaapput imaluunniit pisisinnaatitaapput kinguliini taagorneqartutut annertussuseqartunik:

- 1) Sikaritsit 200-t imaluunniit sikaat 50-it imaluunniit cigarillossit 100-t imaluunniit tupat 250 g,
- 2) Sikaritsinut imusivissat imaluunniit pappiarartassat immertariaannaat 200-t,
- 3) Imigassaq kimittooq (22 pct. sinnerlugu aalakoornartortalik) 1 literi imaluunniit hedviinni (15-22 pct.-imik aalakoornartortalik) 2 literi,
- 4) Viinni nerriseq (15 pct. inorlugu aalakoornartortalik) 2,25 literi,
- 5) Immiaaqqat 2 literi,
- 6) Imeruersaatit kulsyretallit 2 literi,
- 7) Tipigissoq 50 g aamma 0,25 literi tipigissut kimikinnerit. Tamakkua saniatigut kiinnamut tarngutit tipigissullu allat katillugit annerpaamik 1.000 koruunit nalinginut,
- 8) Sukkulaatinut mamakujuttunillu nioqqutissiat katillugit 2 kg,
- 9) Kaffit imaluunniit tiit 1 kg, aamma
- 10) Neqi, neqinit nioqqutissiat imaluunniit timmissat katillugit 5 kg.

*Imm.* 3. Inuit 18-inik ukioqalereersimasut kisimik tupanit nioqqutissianik, imigassanik kimittuunik, viinninik immiaaqqanillu akitsuuteqanngitsunik pisisinnaapput.

**§ 2.** Tikittunut nioqqutissanik akitsuuteqanngitsunik nioqquteqarneq § 1 naapertorlugu pissaaq, mittarfinnilu taamatut nioqquteqarnissamut Akileraartarnermut Pisortaqarfimmit akuerineqarsi-masuni taamaallaat pisinnaalluni.

**§ 3.** Angallassinermi sulisuusut, tassa inuit umiarsuarni timmisartunilu nunat tamat akornanni angalasuni angallassissutip ingerlanneqarnerani imaluunniit taassuma iluani suliaqartut, ullut unnuallu 15-it inorlugit sivilissusilimmik Kalaallit Nunaata avataaniikkallarnerup kingorna uternerminni makkuninnga eqqussisinnaatitaapput:

- 1) Sikaritsit 60-it imaluunniit sikaat 40-t imaluunniit cigarillossit 50-it imaluunniit tupat 250 g,
- 2) hedviinni 2 literi aamma viinni nerriseq 2,25 literi, kisianni imigassanik kimittuunik pinnatik,
- 3) tipigissoq 50 g aamma 0,25 literi tipigissoq kimikinnerq, aamma

4) kaffit tiilluunniit 500 g.

*Imm. 2.* Ulluni unnuanilu 15-ini taakkuluunniit sinnerlugit Kalaallit Nunaata avataaniikkallarnerup kingorna angallassinermi sulisuusut § 1-imi maleruagassat naapertorlugit nioqqutissanik nassarsinnaapput.

**§ 4.** Nunat allamiut aalisariutaanni Kalaallit Nunaata imartaani aalisartuni aammalu umiarsuarni Kalaallit Nunaata imartaaniinnerminni nioqqutissanik akitsuuteqanngitsunik nassataqarnissa-minnut akuerineqarsimasuni, umiarsuup inuttaanut ataatsimut ullormut unnuamullu ataatsimut amerlanerpaamik ulluni 28-ni naatsorsuullugu nassarneqarsinnaapput viinni 1 literi, imaluunniit hedviinni 0,5 literi, imaluunniit imigassaq kimittooq 0,25 literi, imaluunniit immiaaq-qat 2 literi aamma tupanit nioqqutissiat 40 g.

*Imm. 2.* Umiarsuarni inuttaasut, imm. 1 naapertorlugu nioqqutissanik akitsuuteqanngitsunik pissarsisimasut, akitsuuteqarfusumit aallarnissartik pissutigalugu umiarsuarmit niusimasut nioqqutissanik akitsuuteqanngitsunik §§-ini 1-imi 3-milu annertussusissamut aalajangersakkat annertoqataannik, nassataqarsinnaatitaapput.

*Imm. 3.* Imm. 1 naapertorlugu akitsuuteqannginnissaq taamaallaat nioqqutissanut, umiarsuup akitsuuteqarfusup avataani pisiarisimasaanut, atuuppoq.

**§ 5.** Takornariat nunat allamiut umiarsuaannut ilaasartaatinut ilaasut umiarsuup Kalaallit Nunaata imartaaniinnerani akitsuuteqanngitsunik atugaqarsinnaatitaapput.

*Imm. 2.* Takornariat, imm. 1 naapertorlugu akitsuusigaanngitsunik atugaqartut, nioqqutissanik akitsuusigassanik allanik nunaliaasseqqusaanngillat, taamaallaat tupanit, sukkulaatinit aamma mamakujuttunit nioqqutissiat, nammineq atugassat. Kalaallit Nunaat aqqusaarlugu angerlamut aallarnissaq akuersissutigineqarpat takornariat § 1 naapertorlugu nioqqutissat akitsuuteqanngitsut nassatarisinnaavaat.

*Imm. 3.* Imm. 1 naapertorlugu akitsuuteqannginnissaq taamaallaat nioqqutissanut, umiarsuup akitsuuteqarfusup avataani pisiarisimasaanut, atuuppoq.

**§ 6.** Inuit akitsuuteqarfusumi aalajangersimasumik najugaqanngitsut najugaqarallartuunngitsulluunniit angalanerni nammineq atugassatut akitsuuteqanngitsunik eqqussinnaavaat tipigissut, kiinnamut tarnгутit tipigissullu kimikinnerit nioqqutissanik eqqussuinnermi akitsuutit pillugit Inatsisartut inatsisaanni nr. 19, 30. oktober 1992-imeersumi § 1, nr. 18 naapertorlugu akitsuusigassaasut, taamaaliorinnaappullu taakkua annertussusaat suunerilu piffissap angalaffissap sivilissusianut Akileraartarnermut Pisortaqarfiup naleqquttuursorippagit.

**§ 7.** § 1 aamma §§-it 3 - 6 malillugit akitsuusiinnginnissamut piumasaqaataavoq pisiat ima-luunniit angalanermi atortut inuup nammineq nassassagai angalanermiluunniit nassataminnut ilanngullugit nassassagai, taamaalilluni pisiat imaluunniit angalanermi atortut Akileraartarnermut Pisortaqarfimmut takutissinnaaqqullugit.

**§ 8.** § 1-imi, imm. 2-miit 3-mut, § 2-mi, § 3-mi, imm. 1-imi, § 4-mi, imm. 2-mi, § 5-imi, imm. 2-mi aamma § 7-imi aalajangersakkanik piaarluneerluni mianersuaalliorujussuarluniluunniit unioqqutitsisoq akiliisitsinermik pillarneqaatissinneqarsinnaavoq.

*Imm. 2.* Imm. 1-imi taaneqartutut unioqqutitsisoqarneratigut imaluunniit unioqqutitseriartoqaraluarnatigut akiliisitsinermik pillarneqaatissiilluniluunniit akiliisitsisoqanngikkaluatoq nioqqutissaq, taannaluunniit peqanngippat taassuma aningaasanngorlugu nalingata amerlaqatai, arsaarinnissutigineqarsinnaapput.

§ 9. Nalunaarut manna 1. januar 2005-imi atortuulissaaq.

*Imm. 2. Tamatumunnga peqatigitillugu tikinnermi nioqqutissanik akitsuuteqanngitsunik eqqussisinnaaneq pillugu nalunaarut nr. 23, 25. oktober 1996-imeersoq atorunnaarsinneqarpoq.*

*Namminersornerullutik Oqartussat, ulloq 2. december 2004.*

Josef Motzfeldt

/

Kaare Hagemann

**Namminersorlutik Oqartussat**

Imaneq 4

3900 Nuuk

E-mail: [nsninatsit@nanoq.gl](mailto:nsninatsit@nanoq.gl)

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut